

Хоҳлагинингизни қилинг!



16:25 / 23.03.2018 5155

Албатта, оятларимиз ҳақида эгрилик қиладиганлар Бизга махфий бўлиб қолмаслар. Оловга ташланадиган одам яхшими ёки қиёмат куни омон ҳолида келадиган одамми?! Нимани хоҳласангиз, қилаверинг. Албатта, У Зот нима қилаётганингизни кўриб турувчидир.

Бу оят Қуръони Карим мўъжизаси бўлиб, Аллоҳнинг Биру Борлиги ва чексиз қудратига далолат қилувчи борлиқдаги оят(белги)ларга нисбатан эгрилик ила муносабатда бўлган одамларнинг аҳволини баён қилади.

«Албатта, оятларимиз ҳақида эгрилик қиладиганлар Бизга махфий бўлиб қолмаслар».

Уларнинг кимлиги ҳам, Аллоҳнинг оятларига нисбатан қилган эгрилик, кофирлик ва нобакорлиги ҳам – ҳамма-ҳаммаси Аллоҳнинг Ўзига равшандир. Уларнинг барча амаллари ҳисоб-китоб қилингач, дўзахга ташланадилар.

«Оловга ташланадиган одам яхшими ёки қиёмат куни омон ҳолида келадиган одамми?!»

Аллоҳнинг оятлари ҳақида эгрилик қиладиганлар қиёмат куни дўзахга, тўғрилик қиладиганлар жаннатга кирадилар. Хўш, улардан қайси бири яхши? Ҳамма нарса маълум ва очиқ-ойдин бўлди. Энди

«Нимани хоҳласангиз, қилаверинг».

Хоҳласангиз, қуёшга сажда қилинг. Хоҳласангиз, ойга сажда қилинг. Хоҳласангиз, Аллоҳнинг оятлари ҳақида куфр сўзлар айтинг.

«Албатта, У Зот нима қилаётганингизни кўриб турувчидир».

Ҳар бир ишингизни Аллоҳ таоло кўриб туради.

Қиёматда амалингизга яраша жазолайди.

Шайх Муҳаммад Содиқ Муҳаммад Юсуф

(Тафсири Ҳилол китобидан)